



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Name of School : PLK MRS MA KAM MING - CHEUNG FOOK SIEN COLLEGE

學校名稱 : 保良局馬錦明夫人章馥仙中學

Name of Play 劇名 : 娥頸橋之戀

Script writer 劇作者 : 保良局馬錦明夫人章馥仙中學 - 戲劇學會 改編

Synopsis 故事大綱 :

立法會選舉塵埃落定，不過一幅「娥頸橋之戀」相片就令全城鬧得熱烘烘。突然間，學校內亦流傳一幅「娥頸橋之戀 2.0」相片，這次的男主角不是議員明星，而是教育界的明日之星－胡岳橋老師；女主角不是梁粉玉娥，而是楚楚可憐的玉娥同學。

「弊！比人影咗相添！」

師、生之間究竟如何角力？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第一場

【下課鐘聲響起】

【課室】

岳橋老師： 好，我地今日到呢度，大家後日記著交功課。謝珊知道嘛？

【謝珊不耐煩】

岳橋老師： 好，各位同學再見！

眾人： 胡老師再見

娥： 岳橋老師！

岳橋老師： 唐玉娥，咩事呀？

娥： 我...

岳橋老師： 【岳橋老師見娥有口難言】唔，不如我哋落教員室傾？

娥： 哦...

【岳橋老師與娥離開】

Daisy： 走先喇我，趕著補習呀！

Cherry： Daisy，我都要去排球隊練波，等埋我呀！

謝珊： 等陣！唔該所有同學留低！我有重要事情宣佈！

Cherry： 聽日先講啦，我遲左去排球隊既話，又俾教練鬧架喇。

【Daisy 拉住 Cherry】

Daisy： Cherry 呀，但係阿珊話有嘢講呀嘛，聽埋先啦。

俊輝： Cherry Daisy，係你地兩個咁乖聽佢指點架咋，我走先，再見。

Daisy： 俊輝...

謝珊： 好呀！如果你唔想知道呢單學校醜聞既話，咪隨便離開囉。

眾人： 學校醜聞？

謝珊： 正確啲講，呢個醜聞係屬於我地尊貴既岳橋老師。

Daisy： 岳橋老師有咩醜聞呀？

俊輝： 有野就快啲講，唔好喺度賣關子。

【謝珊拎出一張相片】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

謝珊： 大家先睇吓呢張相先！

Daisy： 哦，娥頸橋之戀丫麻。

Cherry： 咩係娥頸橋之戀呀？

俊輝： 搞錯呀，咁都唔知！之前立法會選舉完左之後，呢兩個參選人互相道別行得好近咁樣握手，跟著俾傳媒影到，啲網民就笑佢地有野，仲幫佢地張相起左個名叫《娥頸橋之戀》。

謝珊： 俊輝講得無錯！不過原來我地學校都有一個《娥頸橋之戀》喎！

俊輝： 你到底想講咩啫？

【謝珊拎出另一張相片】

謝珊： 登登登登！大家睇吓！屬於我地學校既《娥頸橋之戀》！

Daisy： 呢個咪...

謝珊： 岳橋老師！

Cherry： 痴著佢個頭嗰個邊個黎架？

俊輝： 似係我哋班...

謝珊： 唐玉娥同學！

眾人： 咩話？！

謝珊： 嚇親哩？

Cherry： oh my god...

Daisy： 你係邊到攞到呢張相架？

謝珊： 係我上個星期影既。

Daisy： 你影既？

俊輝： 咪著先謝珊，你搞清楚未架？你就咁影呢幅相都好難證明岳橋老師同玉娥同學有嘢架喎，就好似嗰兩個議員一樣咁喬係角度問題咋喎。

謝珊： 我親眼睇到佢兩個行得好近㗎！

Cherry： 真既？

謝珊： 緊係，所以我先即刻拎部電話出黎影低佢。

俊輝： 有無其他證據先？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

謝珊： 仲要證據？我話俾你聽我對眼同埋呢張相就係證據！

Cherry： 唔係喎珊姐，有無其他同學都睇到你見到既野先？

謝珊：咁又無...

俊輝： 無？咁你叫我地點信你呀？

Cherry： 係囉珊姐，唔好亂咁屈老師呀，好大件事架。加上，我就唔信岳橋老師會咁囉，佢啱啱先拎咗個咩卓越教學獎，前途一片光明，點會搞啲咁嘅嘢呀？

謝珊： 同你講都嘍氣。好丫，唔信我唔緊要，你地呢幾日自己留意吓胡岳橋同唐玉娥喺學校裡面既一舉一動咪知道發生咩事囉。

俊輝： 我真係無你咁得閒，呢張相咁無聊，送比我做通識剪報啦！再見。

謝珊： 喂！俊輝！

【俊輝離開】

Cherry： 珊姐，我地都走先喇，再見。

謝珊： Daisy，連你都唔信我？

Daisy： 唔係唔信，不過...我真係趕住補習喇，走先。

【Daisy 及 Cherry 離開】

謝珊： 證據？好呀。

【燈暗】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第二場

【門口角落】

【俊輝經過，看著娥頸橋之戀的相。】

俊輝： 娥頸橋之戀？傻傻咁...

【岳橋老師及玉娥同步出，岳橋老師遞上紙巾。】

【俊輝抬頭見到他們】

俊輝： 娥頸橋之戀？？

【俊輝躲在一旁偷聽】

岳橋老師： 咁落去唔係辦法嗰啲，你睇你落晒型咁，就嚟就要做手術，你咁既狀態，點掂呀？唔...你唔好咁擔心啦，總之呢段時間有咩唔妥記著第一時間通知我，喲，呢度有 D 錢，你拎去醫院先搞掂佢啦。

【陳叔入，在輝背後看佢看什麼】

【玉娥點頭離去。】

俊輝： 岳橋 sir 俾錢唐玉娥去醫院搞掂佢？...唔通？

陳叔： 【嚇佢】細路，鬼鬼祟祟喺度做乜呀？

俊輝： 陳叔！無嘢呀！

陳叔： 無嘢？係咪做緊啲咩唔見得光既嘢呀？

俊輝： 緊係無啦，佢哋就真係唔見得光喇！陳叔，我有緊要事，走先！

【俊輝急速離去，遺留了娥頸橋之戀的相片。】

陳叔： 喂，同學，你跌咗嘢呀。【執起張相】呢張睇查查既，乜都睇唔到，乜嚟架？

【燈轉】

【形體片段輕快音樂伴奏，俊輝、Daisy、Cherry 在之後的一星期內分別多次遇見岳橋老師及唐玉娥在校內的神祕舉動。】

【最後，燈光凝聚在岳橋老師及唐玉娥身上，二人擺出像被撞破舉動的定格畫面。】

【燈暗】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第三場

【課室】

【小息】

- 謝珊： 係咪呀？！我都話佢地兩個有野架啦！又一齊食早餐、又俾晒錢俾晒紙巾，琴日放學落雨胡岳橋仲擔著把傘同唐玉娥一齊走添呀！
- Daisy： 咁咪即係師生戀！
- Cherry： 究竟佢地幾時開始架呢？之前都唔覺有咩特別既。
- 俊輝： 但係岳橋 sir 點解會睇中陳玉娥呢？
- 謝珊： 嘩！你唔俾胡岳橋突然覺得好孤單，跟著又見到學校裡面有個青春少艾，仲唔心郁郁咩。你地小心啲添呀！
- Cherry： 吓？岳橋老師唔會搞埋我地掛。
- 謝珊： 好難講。
- Cherry： 但係岳橋老師點睇都係一個正人君子喎。
- 謝珊： 知人口面不知心呀。
- Daisy： 其實我地係咪應該同校長講呢？
- 謝珊： 呢個當然要啦。不過我覺得你地都講得啱，我地應該要有多啲既證據，咁校長先會信。
- Cherry： 不如唔好搞咁多野啦，況且岳橋老師平時份人都幾好丫，呢啲始終係人地既私事，我地好似唔應該理。
- 謝珊： 唔應該理？！呢啲係學校既事唔係私事呀！樣樣都唔理，唔怪之得你連《娥頸橋之戀》係乜都唔知啦！
- Cherry： 我又唔係要做議員知黎做乜喎？
- 謝珊： 咁學校既野呢？
- Cherry： 我只係覺得多一事不如少一事啫。
- 謝珊： 學校就係社會既縮影，你唔關心學校將來好自然就唔關心社會，倒頭來受害既係你自己咋。
- 俊輝： 我覺得阿珊講得啱，我地應該撥亂反正，勇武抗爭。
- Daisy： 不過宜家係師生戀咋喎，勇咩武抗爭呀？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

俊輝： 是旦啦，大概係嗰啲對準權力既意思咪得囉。岳橋 sir 宜家根本就係利用老師身份同埋權力喺學校亂搞男女關係。

謝珊： 無錯！所以我地要做番啲嘢，自己學校自己救！

Daisy： 咁我地宜家可以點做呢？

俊輝： 首先，我哋應該要收集同製造更多證據，等佢知我哋已經知道呢件事，然後等佢自己引疚辭職，如果佢厚面皮，唔辭職我哋就先拎啲證據話比校長知。

謝珊： 聰明！團結就是力量，Cherry 你加唔加入？

Cherry： 我唔加入你地係咪會杯葛我架？

謝珊/俊輝： 係！

Cherry： 你地咁坦白我唯有加入啦。

謝珊： Daisy...

【Daisy 示意加入】

謝珊： yeah!今次真係乜仇都報晒！

Daisy/俊輝： 咩話？

輝：

謝珊： 吓？我無講嘢呀！不如我哋依家一路行一路傾吓點樣製造多啲證據啦！

【珊、輝、Cherry 走】

Daisy： 珊，我都係有啲嘢想問清楚你先。

Cherry： 咁我哋小食部等啦。

【輝、Cherry 走】

謝珊： 咩事咁神秘呀？

Daisy： 頭先你係咪話報仇呀？

謝珊： 【珊不語】

Daisy： 咁即係我無聽錯啦？

不如你老老實實同我講，娥頸橋之戀呢單嘢，其實係咪你自己生安白造出嚟，陷害岳橋 sir？

謝珊： 我做乜要陷害佢呀？

Daisy： 為咗上年嗰件事而報仇囉。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

謝珊： 喂，Daisy，搞清楚先，就算我有幾唔鍾意佢，我都唔會老作啲嘢出嚟屈人囉。今次呢件事，係佢自己其身不正，搞學生在先，我揭發佢，我無害佢架。就算我真係要報仇，都要佢有把柄喺我手，我先有機會報仇架！噏，我講一次，我無陷害佢！

Daisy： 真係無？但係...阿珊，其實諗真啲，我哋都只係見到佢哋兩個成日一齊，事實既真相係點我哋根本都唔知，將一啲唔清唔楚既嘢同全班同學講到係事實咁，咁你同上年岳橋 Sir 鬧你嗰件事有乜分別啫？

謝珊： 唔好將我同佢相提並論呀。點解你係都要拉埋上年件事嚟講啫？

Daisy： 因為我真係好懷疑你既動機，我好懷疑你今次根本就係存心害阿 sir！

謝珊： 喂，夠喇！乜原來你咁睇我？

算，你唔好唔記得，你自己都有份講，你自己親眼見到佢兩個成日一齊架，我無屈佢架。你口口聲聲咁話我，上年嗰隻死貓我為邊個食架？依家就喺度扮好學生，你唔幫我就算啦！我實證明比你睇，呢啲根本就係事實既真相。

【珊走】

【燈轉】

【半年前】

【岳橋老師入】

【謝珊入】

岳橋老師： 你知唔知點解我要罰你留低？你竟然無聊到趁前面個同學唔留意，放堆蕉皮喺人地個位上面，你覺得好好玩咩？

我問係咪你，你仲要咁大聲咁話我話你，好威咩依家？

你返黎學校做咩架？帶成袋蕉皮番黎學校咁有心機，點解唔將啲時間心機擺喺讀書上面？

之前啲嘢，我只係話吓你就算，諗住等你自己反省吓，但係一次係咁兩次係咁三次又係咁，今次仲要無聊到玩蕉皮，我今次一定會同你家長傾吓。

【岳橋老師離去】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Daisy : 你點呀？

謝珊： 無，話幾句啫。

Daisy : 做乜屈自己幫我頂啫？

謝珊： 你見到架，佢問都唔問邊個做，第一時間就話係我。佢根本一直都唔鍾意我，擺明玩針對。

Daisy : 不如我講番件事俾岳橋 sir 知啦。

謝珊： 唔好，你上次話你阿媽好忙唔得閒理你，如果比佢知道你要見家長，實激死佢！我，有乜所謂啫，個個都係咁睇我架啦！

Daisy : 但係...

謝珊： 唔洗講喇，係老友就唔好出聲。有機會，我實會報仇...

【謝珊離去，只剩 Daisy 一人若有所思】

【燈暗】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第四場

【玉娥同學入】

- 俊輝： 女主角呀！
- 謝珊： 喂！娥頸橋之戀。
- 玉娥： 吓？
- 謝珊： **【存心說給 Daisy 聽】**你係咪又趕著去搵岳橋 sir 哩？
- 玉娥： 係呀，你點知我要搵佢架？
- Cherry： 大家都係女仔，岳橋 sir 又高大威猛，明既。
- 玉娥： 咩呀？
- 謝珊： 我哋已經知道發生咩事喇。
- 玉娥： 你哋已經知道？
- 俊輝： 係呀，所以你最好自己小心啲喇。
- 玉娥： 多謝你地關心。
- Cherry： 關心？咁大件事你唔驚架咩？
- 玉娥： 我真係好驚，知道出事嗰一刻真係唔知點算好，不過好彩岳橋 sir 幫我咋，不過唔講著喇，我要趕著去搵岳橋 sir 呀。
- Cherry： 你仲去？！
- 玉娥： 有咩問題呀？
- Cherry： 學校咁多男同學點解要揀老師啫？我地班既俊輝都唔錯丫，係有時 KAI 啲啫。
- 玉娥： 唔好咁話佢啦，雖然佢都比幫得手，但係岳橋 sir 始終成熟啲、可靠啲，有起事嚟都處理得冷靜啲。
- 俊輝： 總之你自己小心啲啦，嗰個岳不群唔係好人黎架...
- 玉娥： 都唔知你哋講咩？古古怪怪咁，真係唔講住喇，多謝晒你哋關心！bye bye!
- 俊輝： 玉娥同學...你跌咗嘢呀!
- Cherry： 咩嚟架？
- 俊輝： 唔知喎，會唔會係...



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

謝珊： 情書？

【眾人想打開嚟睇】

Cherry： 睇人啲嘢，會唔會好無道德呀？

俊輝： 夠佢哋唔道德？

Cherry： 唔好啦！

【眾人爭奪之間撕爛咗】

俊輝： 住你

謝珊： 好掛

Cherry： 我

眾人： 我好掛住你！

謝珊： 唔得！為左阻止胡岳橋既惡行，防止更多同學仔將來會受害，呢個時候我地一定要對準胡岳橋。

俊輝： 無錯！我諗我哋要先嚟一招不打自招，如果唔成功既話就再嚟一招引蛇出洞，我哋要佢喺所有同學面前露出狐狸尾巴！

謝珊： 對準胡岳橋！

俊輝： 對準胡岳橋！

Cherry/俊輝
/謝珊： 對準胡岳橋！

【燈轉】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第五場

【上課】

【課室內貼滿娥頸橋之戀 poster/剪報】

【岳橋入】

岳橋老師： 咦，娥頸橋之戀啲！

謝珊： 阿 sir，你驚呀？

岳橋老師： 驚？我好開心就真。你哋終於都會關心呢個社會上發生既事，雖然只係一啲花邊新聞，但都係一個好開始！

Cherry： 岳橋 sir 呀，你對娥頸橋之戀有乜睇法呀？

岳橋老師： 咁你又有乜睇法呢？

Cherry： 我覺得佢哋兩個唔可以喺埋一齊囉。

岳橋老師： 男未婚女未嫁，佢兩個喺埋一齊有乜問題呢？

俊輝： 咁佢兩個一個撐 CY，一個反 CY，政見唔同，身份唔同，好難一齊啫。玉娥，你話呢？

玉娥： 【玉娥心不在焉】吓？都唔係既，佢哋兩個身份咁懸殊，都可以排除萬難喺埋一齊，就證明佢哋係真心相愛啦。

俊輝： 真心相愛就可以喺埋一齊架喇咩？就好似...

謝珊： 師生戀！

俊輝： 係囉，師生戀唔通我哋話佢哋係真心相愛無問題咩？

玉娥： 唔...岳橋 sir...

岳橋老師： 咁我又想聽吓你哋分析一下點解師生戀有問題。不如咁，我哋嚟個即興辯論，邊個做正、邊個做反？

【Cherry、俊輝、謝珊舉手】

俊輝： 我哋做反方。

岳橋老師： OK，咁其餘做正啦。

謝珊： 首先，為人師表，應該嚴守道德標準，亂搞男女關係，仲要搞自己學生，係絕不能被社會、家長同學生所接受！



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Daisy : 反方呢位同學，開口埋口都係搞，請問你係咪親眼見到先？人哋傾下計就話人哋有景轟，依家呢個社會，有圖都未必有真相啦，我哋點可以亂咁話人亂搞男女關係呢？一件事只係睇表面，又唔去了解整個畫面就下結論，到大個既時候點算？啲人不斷做謠生事，你地有無諗過主角們既感受呀？

俊輝： 老師喺角色身份上，根本就存在一個權威性，佢用呢個身份同學生一齊，根本就唔恰當、唔專業！

玉娥： 中學生同老師，每日有成十幾個鐘頭喺學校，能夠喺學校到一個明白佢壓力、問題既人，可以互相傾訴、支持。只要學生啲一邊，思想夠成熟，應該唔會存在同學剛才所講既權威欺騙無知。

Cherry： 我查過架喇，香港係有教育則例架。如果真係師生戀，老師嗰方面，要即時解僱架。做人留一線，日後好相見，知機既就搵個借口自動辭職，如果唔係，到時要玩踢爆既話，大家都唔開心。

岳橋老師： 但係乜香港唔係一個講求自由、人權既社會咩？言論自由、婚姻自由，喺唔傷害到別人既情況下，大家係咪可以盡情咁行駛屬於我哋既自由同權利呢？

謝珊： 阿 sir，你咁講即係你覺得你同唐玉娥係無問題啦？

岳橋老師： 正確啲講，仲有 Daisy

【眾人驚訝】

眾人： 吓？

Daisy： 我？

【燈暗】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第六場

【珊、輝、Cherry 在台上商討對策】

【Daisy 入】

Daisy： 夜媽媽黑蚊蚊，你哋叫我嚟呢度做乜呀？

謝珊： 我要你自己親眼睇清楚胡岳橋既真面目。

Daisy： 今朝喺課室仲玩唔夠呀？無啦啦拖埋我落水...

謝珊： 咪係囉，你真係仲信胡岳橋係好人？

俊輝： 呀，岳橋 sir 都真係幾勁嘞，佢今朝嚟一招借力打力，拉多個人落水做煙幕。小弟真係佩服佩服。

Cherry： 喂，岳橋老師過緊嚟喇！

【Daisy、輝、Cherry 躲到一旁】

【珊背向老師】

岳橋老師： 唐玉娥，你搵我咩事呀？我一返教員室，喺枱面見到你既字條就即刻趕嚟呢度，你無咩事呀嘛？

謝珊： 岳橋老師...

岳橋老師： 點解你把聲咁怪既？

謝珊： 我...【珊咳】...我諗我應該係唔夠休息，所以病咗，有啲唔舒服

岳橋老師： 哦，係呢，究竟你搵我咩事呀？係咪個手術出咗事呀？

謝珊： 我有啲嘢想問清楚你。

岳橋老師： 你問啦。

謝珊： 你成日同我一齊，其實你係咪鍾意我？

岳橋老師： 吓？你點會咁諗架？

謝珊： 你答我啦！

岳橋老師： 我點會無啦啦鍾意你呀？

謝珊： 咁點解你咁關心我呀？

岳橋老師： 我都唔知你講乜，我其實真係只係關心你，呢種關心，係出自老師對學生既嗰種關愛嚟架咋...



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

謝珊： 無理由既，呢度都無人，你唔怕坦白啲講啲。

岳橋老師： 仲唔夠坦白？

謝珊： 咁你又陪我、又比錢我、落雨又遮我，仲唔係鍾意我？

岳橋老師： 如果任何一個學生有需要，而我能力又許可既話，我都一定會盡力幫佢架啲。

就好似...俊輝咁啦，我周不時都會約佢打吓波，同佢傾吓計，一來可以幫佢減吓肥，二來等佢唔好成日剩係識 dum 低頭讀書...

又好似 Cherry 咁，佢份人怕事又蛇 ，呢兩年我都有鼓勵吓佢，我叫 miss Lai 比佢入排球隊，等佢試多啲嘢

仲有謝珊添...

謝珊： 謝珊？全班都知你唔鍾意佢個啲。

岳橋老師： 個個學生對我嚟講都係獨一無二，個個我都咁鍾意咁愛錫，我又點會唔鍾意佢個？

謝珊份人係貪玩淘氣啲，但佢份人有正義感，升咗班之後，我覺得佢成長咗好多，識得關心身邊既人同事。不過佢性格有時太剛烈，我怕佢闖禍先成日提住佢話住佢。就好似上年蕉皮嗰件事，嗰個同學對香蕉味敏感架，佢最終搞到人哋要入醫院睇醫生。我知佢仲好嬲我，但有啲事我希望你哋大個喇，要明白，唔可以亂嚟，最後可能會傷害到人。但係大個亦唔代表可以亂諗嘢，我同你...你會唔會諗多啲？

【玉娥入】

玉娥： 岳橋老師，你咁夜仲唔走既？你唔係話女朋友生日，趕住去慶祝咩？

岳橋老師： 唐玉娥？你？咁...

玉娥： 呀，係呀，頭先媽媽打比我，話爸爸個手術好成功，佢依家已經醒返。媽媽話，你借比我啲啲錢，等保險公司賠返時就可以即刻還返比你，真係唔好意思呀。

岳橋老師： 傻啦，最緊要係人無事。

玉娥： 咦？謝珊？你喺度既？你咁夜同阿 sir...慶祝生日？

謝珊： Hello...

玉娥： 唔，岳橋老師，多謝晒你呀，我唔阻你哋喇，我趕住去醫院探爸爸。我哋聽朝再傾啦！bye bye!

【陳叔入、玉娥出】



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

岳橋老師： Bye bye！幫我問候吓你爸爸呀！喂，唔好亂諗嘢呀！

陳叔： 喂，細路，你幾個鬼鬼祟祟喺度做乜呀？

俊輝： 陳叔！無嘢呀！

陳叔： 無嘢？又係你？你係咪做緊啲咩唔見得光既嘢呀？

俊輝： 緊係無啦，呢度無嘢唔見得光啲！

岳橋老師： 謝珊！

謝珊： 係...

岳橋老師： 今次我無估錯啦？

謝珊： 今次？

岳橋老師： 上次蕉皮嗰件事，Daisy 啱啱已經同我講咗其實唔關你事，係我誤會咗你，對唔住。但係今次，你會唔會玩得過份咗啲呀？

謝珊： 對唔住...

陳叔： 岳橋老師，你要唔要我幫手叫訓導老師嚟呀？呢個肥仔成日呢埋一邊唔知搞乜咁，分明有景轟。

俊輝： 陳叔，唔好呀！

岳橋老師： 陳叔，唔駛喇，呢幾個熱血少年睇得多網絡小說，幻想太多啫，無事既！

【玉娥入】

玉娥： 嘩，突然間咁多人既？

岳橋老師： 咦，唐玉娥，你做乜返轉頭既？

玉娥： 岳橋老師，我唔係想阻住你架，但係我好似留咗電話喺課室，先返轉頭咋。

Cherry： **【想向玉娥同岳橋老師道歉】** 玉娥，我哋已經知道晒喇...

玉娥： 吓？你哋都知道噃？

俊輝： 係呀，之前仲誤會你同岳橋 Sir，真係唔好意思。

玉娥： 吓？你哋之前誤會我同岳橋老師做咩呀？

Daisy： 師生戀呀！



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 玉娥： 我同岳橋老師師生戀？哈，點會呀？係師生戀都係謝珊先啦！
謝珊，Happy birthday!你同岳橋老師玩得開心啲喇！我真係趕時間，走先喇！bye
bye!
- 眾人： 師生戀??
- 路人： 嘩，師生戀呀！影低佢啦！
- 岳橋老師： 又想點呀？

【燈暗】

【全劇完】